

全宋詩輯補

湯華泉 輯撰

第五冊

黃山書社

全宋詩輯補
第五冊

全宋詩輯補

湯華泉 輯撰

第五冊

黃山書社

“十二五”國家重點出版規劃項目
本書出版得到國家古籍整理出版專項經費資助
安徽大學“211工程”三期經費資助

爲月堂和尚人壙

顧鑒全抽妙莫傳，星移斗轉直如弦。昨宵舞罷雲門曲，回首韶光二月天。

圓寂淨慈方丈，月堂禪師和尚。早依圓悟，晚謁雪峰。掛古帆於大目溪頭，透清波於妙湛海底。累膺詔旨，遍坐名藍。截鐵斬釘，咬薑呷醋。五十年弘持妙道，曲借傍提；一平生建立法幢，單拈獨掇。時節既至，得路便行。佛祖慧命，如塗足油。雲門正宗，如拆襪綫。衲子英標，零落大道，破碎無聞。嗚呼，泰山其頽，哲人其萎。昏衢暗暝，衆生無依。祇而今虎踞龍蟠，猿啼鶴怨；玉埋黃壤，名煥丹青。即不無敢問大衆：作麼生是月堂老人不露風骨底句？莫是諸行無常，是生滅法，生滅滅已，寂滅爲樂麼？錯，錯，畢竟如何！以拄杖擊香卓一下云地戶牢關銀浪淨，天爐不放火雲飛。苔封古路星河暗，拾得寒山總不知。

爲了禪人秉炬

冷露滴禪衣，朔風敗殘葉。撒手那邊行，舉步頓超越。觸目是菩提，衲僧眼中屑。火後一莖茅，有口無處雪。唯有了禪人，深明個時節。無明山當下便摧人我，擔實時拗折。歸去來兮，生死不相關，亘古今兮，離微俱不涉。一句子是真語者，實語者，不誑語者，不異語者？諦聽諦聽！豎起火把云諸法從緣生，緣離法即滅。我師大沙門，常作如是說。

爲老隆上座秉炬

四山無路隨他去，一點有依終始疑。滯水遇風波浪起，老隆還有轉身時。老隆首座，既解轉身，爲甚不能吐霧？大衆，忽若被他興雲吐霧時，諸人向甚麼處回互？咄，咄，蠱毒之鄉水莫嘗，謹家之門禍不入。而今要見隆首座轉身處麼？麒麟墮地露栓索，泥牛耕破夕陽春。

爲密上座秉炬

袁州密禪人，去住知時節。春仲麥秋寒，舉步頓超越。不作靈雲見，桃花眼中屑。六用既不_成，萬機俱透徹。依依岸柳翠如眉，片片梨衣飛似雪。密禪人正當恁麼時如何？紅霞散彩

月沉輝，金毛跳出驪龍穴。

爲曹印錄秉炬

四十年來曹印錄，大夢如何竟不還。去住拂開名利眼，死生超脫是非關。嗚呼，秋風吹落葉，秋露滴芙蓉。撒手歸去來，是身非我有。方寸中初無過犯，筆端下豈有異同。而今與你諸人，一一依法施行。遮公案，須是山僧明明結絕。火把子祇在我手裏，且作麼生結絕？輝騰紅焰連霄漢，照徹本來清淨身。在處莊嚴隨處樂，遮回不怕長官嗔。

爲陳宣教除靈

自古聖賢歸寂滅，由來三昧本無聲。皇天若欲興儒釋，何喪斯文太早生！陳宣教還相記得麼？譬如動目，能搖湛水。是知動靜不以像而像，去來不以形而形。是相非相，是真非真。紅霞散彩青山綠，未必僧繚畫得成。既畫不成，且道此個面目從甚處得來？良久云撒手那邊千聖外，更無一法可相呈。

李賢良爲小賢良周周宮人人骨

黑豆生芽金鼎活，靈苗挺秀又還萎。青山不鎖來時路，回首還尋舊隱歸。李賢良門下小賢良周周宮人：來時恁麼來，聖智安可辨。去時恁麼去，佛眼莫能窺。白骨迎歸無縫塔，黃花翠竹滿岩溪。江月照兮松風吹，楚天空闊去何之？一句子，爲提撕。諦聽諦聽，周周宮人，還聞麼？豁關腦後透關眼，看取紅爐片雪飛。《瞎堂慧遠禪師廣錄》卷四。

偈

好是仲春漸暖，那堪寒食清明。萬疊雲山聳翠，一天風月爲鄰。在處華紅柳綠，湖天浪穩風平。山禽枝上語諄諄，再三瑣瑣碎碎，囑付叮叮嚶嚶。你且道他叮嚶囑付個什麼？記取明年今日，依舊寒食清明。《全宋詩》收漏後三句。

感微疾示衆

淳熙二年閏，季秋九月旦。鬧處莫出頭，冷地着眼看。明暗不相干，彼此分一半。一種作貴人，教誰賣柴炭？向你道不可毀，不可贊，體若虛空沒涯岸。相喚相呼歸去來，記取明年正

月半。《嘉泰普燈錄》卷一五。《全宋詩》收漏前二句。

拈古

汲水已歸林下去，待船猶立渡頭沙。同上卷二六。

示無住道人

瞎堂有個不是，掃盡衲僧巴鼻。驚回陝府鐵牛，吞却山河大地。同上卷二九。

上孝宗頌

鉢盂走馬向天庭，漫踏天街馬不驚。回首飛來峰上望，白雲包盡帝都春。《武林梵志》卷九。

頌古

雪竇云：『克賓要承嗣，興化罰錢出院且致，却須索取這頓棒始得。且問諸人，棒既吃了，作麼生索得？雪竇要斷不平之事，今夜與克賓雪屈，以拄杖一時趕散。』

克賓維那，法戰不勝，曾因國離披金甲。後來出世，法嗣興化，不爲家貧賣寶刀。興化臂健，

尚嫌弓力軟。雪竇眼明，猶識陣雲高。《禪宗頌古聯珠通集》卷二六。

張登 二一七六〇

漳州

漳州悲遠道，地理極東甌。境曠窮山外，城標漲海頭。《輿地紀勝》卷一三二漳州。

曾惇 二一七六五

寄建昌使君汝士胡丈

麻姑岩嶢青插天，瀑泉奔騰千仞懸。星壇突兀倚絕壁，平原太師有銘鏤。神人一去已千歲，諸峰尚作翔鸞勢。使君雙旌來幾時，氣節清高兩相值。南城南豐萬家邑，異人間出俱屹立。故家遺俗今仍存，後來青紫如俯拾。使君落落真人豪，發硎聊爾試牛刀。虛堂坐嘯萬事理，

村村作社沽春醪。我生江湖任流轉，老矣未識鄉閭面。但聞老父誇新尹，古稱循良今始見。五年兩把淮上麾，家山欲歸殊未期。速呼江船渡彭蠡，扶藜去讀君山碑。《永樂大典》卷一四三八
○引《建昌府江志》。

謝 伋 二一七二

石門山洞口留題

分□□□舊經過，石上篇章□□□。□隊尋花來洞□，□□□日喜行和。

我本□□□（問）「閑」逸人，誤恩復使治斯民。塵事擾來容貌改，燭鬢羞到碧潭濱。清李遇孫《括蒼金石志》卷五，詩刻右行。

葛立方

二一七八九

子直宗丞細香亭產雙竹

君家葛陂龍，生子彌空山。駢頭玉嬰兒，半脫虎豹斑。異哉竹連理，下俯蒼雲灣。誰爲小掠削，如合雙髻鬟。直上兩股分，蕭瑟青霞端。湘浦列英娥，香山聯素蠻。懸知直節公，未肯甘獨鰥。東床瑚璉姿，碧落閑仙官。未爲尺一挽，枯藤且盤跚。我亦閑處着，嗜好同鹹酸。摩挲此雙殼，容我俱躋攀。恐便踏龍尾，枳棘難栖鸞。

蕭蕭淇園姿，屯作三畝陰。草木臭味同，夏夏難同心。中有拂雲幹，對峙鏘璆琳。楚越自肝膽，異體成同襟。雨過兩龍吼，風來雙鳳吟。膠漆有陳雷，參商無闕沉。心期等無二，其利乃斷金。旌之赤玉欄，寫以朱絲琴。雙竹琴調。主人有內美，忠誠罄明簪。此君爲君出，無知乃知音。我詩何足弦，聞美不得愔。安得河中文，爲君告來今。《永樂大典》卷一九八六六引葛立方

《歸愚集》。

釋雲

一一〇五三

小傳未引燈錄，法嗣誤。《增集續傳燈錄》卷一、《續燈存稿》卷一有傳，嗣法此庵守淨。

端午

今朝五月五，擊動禾山鼓。鬱壘與神荼，歡呼齊起舞。報道山門內外，乃至諸莊田舍兒，一平安。惟有禪和子，肚裏七上八下，被個狗子無佛性苦。諸人者，欲不苦，透得趙州一字關，手握黃金如糞土。《全宋詩》收前四句。

偈

我昔毀佛及諸祖，皆由無始貪嗔痴。從身口意之所生，一切我今皆懺悔。

却得嶺南信，報導潭州城裏好養民，米賤柴多足四鄰。唯有道吾和尚，不解深山藏拙，却來鬧市裏，看人樂神。驀被魚行老媪，劈面唾云：遮野狐精！青天白日，向遮裏見神見鬼，他後魔魅人家男女，未有了日，祇得飲氣吞聲。支提拄杖子，聞而呵呵大笑曰，好事從來不出門。參禪人，多逐妄，不用起模仍畫樣。春風吹綻桃李花。

今朝五月十有五，十日作了八日雨。不薦檐頭滴滴聲，說妙談玄何足數。君不見，皓布禪，嘗有語：夜雨打倒蒲萄棚，知事普請行者人力，撐底撐，拄底拄。阿呵呵，莫錯舉，從來大道無規矩。《全宋詩》收前四句。

大唐國內無禪師，觀音院裏有彌勒。參禪人，休揀擇，不見古人有言兮，毫厘有差，天地懸隔。

春雨乍晴，景物舒豁。日暖風和，鳥啼花發。伶俐漢，點着便知。也有照，也有用。也有縱，也有奪。更說甚雪峰鞦韆，德山托鉢。俱胝一指，臨濟四喝。

泥捏夜叉水裏走，嚼碎通紅鐵一團。須彌南畔三千里，吹毛纔舉斗牛寒。

演遠和尚千年桃核拈語

千年桃核也生芽，着葉抽枝便發花。結得果來能樣好，元來却是大甜瓜。大甜瓜，橘柚名查。栗子菘子菘子，桃葩杏葩李葩。也有福州橄欖，也有宣州木瓜。當地牛心柿子，西川蜜浸芎芽。

偈句

直截根源佛所印，摘葉尋枝我不能。
天上忽雷驚宇宙，井中之物不抬頭。
山花不費栽培力，自有春風管帶伊。
見人須棄敲門物，得路仍忘墮子名。

答僧問

等閑挨落天邊月，徐行踏斷流水聲。

青林纔換葉，紅蕊便開花。《續古尊宿語要》辰集《別峰雲和尚語》。

偈

千種言，萬般解，祇要教君長不昧。
且道不昧個什麼？
喚作竹篋則觸，不喚作竹篋則背。

《增集續傳燈錄》卷一。

善財南詢頌

鬢角分明者小兒，肚皮好待你聞知。
賺他五十三知識，敗闕都盧納向伊。
《叢林盛事》卷下。

姚寬

二二〇六〇

和釋自益長樂秀峰寺題壁

陰陰石壁暮生寒，底事詩人去未還？
海闊雲深無處問，子規啼斷月中山。

惜春絕句

游絲繫日春無迹，飛絮穿簾雪不寒。
惟有閑雲輕映日，留陰特地惜花殘。

遣懷

日晚燕爭戶，風飄香入簾。

次許志仁韻

詩社得公能掉磬，墻東知有隱君翁。《娛書堂詩話》。

謝鳳 一一〇七五

《嘉泰普燈錄》卷二三記：『教授謝鳳居士，字子儀，號休休，因疾甚，子弟寫遺像，公見，援筆題曰云云。』時在紹興間，《全宋詩》所收謝鳳，當爲此人。

自題像贊

我心之憂，日月如流。仰箭必墜，覆水難收。蝮毒在手，火然着頭。天下輕於兩臂，此身同乎一漚。身與物孰重？心與身孰優？兼儒釋老之學，非內外中之求。一既不着，三何由收？殊途同歸，萬壑交流。道并行而不悖，聊卒歲以優游。一藥對病，豈問乎君臣狼虎；一味適口，豈擇乎藜藿珍羞。孰爲瞿聃？孰爲孔周？雖任重而道遠，未嘗休而未嘗不休。故曰休休。《嘉泰普燈錄》卷二三。

史浩 二二二二二

送潮士王司業知温州

平生子韓子，廟食南海濱。千載凜英氣，鍾此真天人。道德昔未泰，膏流今不屯。向來子韓子，無乃公前身？《永樂大典》卷五三四五引《三陽圖志》。

延慶始祖法智大師畫像贊

予昔與覺雲連公游，因綴其語，爲法智大師贊。歲久不能記，今爲延慶詢師得之。乾道壬辰中元東湖真隱齋浩。

靈山一席，儼在天台。後十三葉，復生奇才。唱道四明，講肆宏開。溥海聲聞，泚泚雲雷。章聖在御，中使鼎來。得法大旨，皇心恢恢。錫號法智，宸章昭回。抵今後學，咸仰崔嵬。蘭馨菊芳，本一根荄。嗚呼，是爲法宇之柱石，教鼎之鹽梅。宜茲幻影，歷千古而無塵埃。

《四明尊者教行錄》卷七。